

-NACRT-

Na osnovu člana 12. tačka a) i 18. tačka b) Ustava Kantona Sarajevo („Službene novine Kantona Sarajevo“, broj: 1/96, 2/96, 3/96, 16/97, 14/00, 4/01, 28/04 i 5/13) i člana 35. Zakona o platama i naknadama policijskih službenika Federacije Bosne i Hercegovine („Službene novine Federacije BiH“, broj: 45/10), Skupština Kantona Sarajevo na sjednici održanoj _____, donijela je

ZAKON O PLATAMA I NAKNADAMA POLICIJSKIH SLUŽBENIKA KANTONA SARAJEVO

POGLAVLJE I – OSNOVNE ODREDBE

Član 1.

(Predmet Zakona)

Ovim zakonom uređuju se plate, platni razredi i koeficijenti za platne razrede policijskih službenika Ministarstva unutrašnjih poslova Kantona Sarajevo (u daljem tekstu: Ministarstvo), naknade, kao i druga pitanja koja se odnose na primanja policijskih službenika.

Član 2.

(Definicije pojmova korištenih u Zakonu)

Pojmovi korišteni u ovom zakonu imaju sljedeće značenje:

- a) „policijski službenik“ u smislu ovog zakona smatra se uposlenik organa unutrašnjih poslova sa policijskim ovlaštenjima u Kantonu Sarajevo;
- b) „radno mjesto“ je pozicija utvrđena Pravilnikom o unutrašnjoj organizaciji Ministarstva (u daljem tekstu: Pravilnik) na koju se raspoređuje policijski službenik za vršenje poslova utvrđenih za to radno mjesto;
- c) „osnovica za obračun plate“ predstavlja novčani iznos u konvertibilnim markama koji se koristi za određivanje osnovne plate;
- d) „platni razred“ predstavlja razvrstavanje radnih mjesta, utvrđenih u Pravilniku, na određene pozicije radi određivanja iznosa osnovne plate policijskog službenika;
- e) „koeficijent“ predstavlja brojčanu vrijednost, koja se iskazuje arapskim brojevima, za svaku poziciju radnog mjesta, koje je razvrstano u platne razrede iz tačke d) ovog člana i služi za utvrđivanje visine osnovne plate;
- f) „noćni rad“ u smislu ovog zakona je rad između 22,00 sata i 06,00 sati;

Član 3.

(Budžetsko osiguranje sredstava za plate i naknade)

(1) Finansijska sredstva za plate, naknade i druga primanja policijskih službenika predviđena ovim zakonom planiraju se i osiguravaju iz Budžeta Kantona Sarajevo (u daljem tekstu: Budžet).
(2) Vlada Kantona Sarajevo (u daljem tekstu: Vlada) će radi nesmetanog funkcionisanja organa vlasti Kantona za korisnike budžeta na koje se odnosi ovaj zakon utvrditi jedinstveni isplatni koeficijent za obračun plata u određenom postotku za fiskalnu godinu ukoliko to zahtjeva održavanje makroekonomske stabilnosti u skladu sa Zakonom o Budžetima u Federaciji Bosne i Hercegovine.

Član 4.

(Načela za utvrđivanje visine plate)

Pri određivanju iznosa plate i naknada za policijskog službenika poštivat će se sljedeća načela:

- a) isti koeficijent za isti čin policijskog službenika;
- b) transparentnost, prilikom raspisivanja javnog konkursa i oglasa za popunjavanje radnog mjesta policijskog službenika i objavljivanja podataka o pripadajućoj osnovnoj neto plati za oglašeno radno mjesto.

POGLAVLJE II – PLATE I DODACI

Član 5.

(Osnovica za obračun plate)

- (1) Za policijskog službenika se primjenjuje osnovica za obračun plate utvrđena članom 8. Zakona o platama i naknadama policijskih službenika Federacije Bosne i Hercegovine ("Službene novine Federacije BiH", broj: 45/10).
- (2) Izuzetno od stava (1) ovog člana Vlada, uz postignuti dogovor sa Sindikatом policije Kantona Sarajevo, (u daljem tekstu: Sindikat) može utvrditi visinu osnovice umanjenu do 10 % u odnosu na osnovicu za obračun plate iz stava (1).

Član 6.

(Struktura plate)

- (1) Plata policijskog službenika utvrđuje se u bruto i neto iznosu.
- (2) Plata u bruto iznosu obuhvata neto platu, poreze i doprinose.
- (3) Vlada će propisati obrazac, izgled liste i način prikaza obračuna plate u roku od 30 dana od dana stupanja na snagu ovog zakona.

Član 7.

(Elementi za utvrđivanje osnovne plate)

- (1) Osnovnu platu policijskog službenika određuje osnovica iz člana 5. ovog zakona pomnožena sa koeficijentom platnog razreda iz člana 10. ovog zakona i iznos povećanja ostvaren po osnovu radnog staža iz člana 8. stav (3) ovog zakona.
- (2) Osnovna plata obračunava se i iskazuje mjesečno za puno radno vrijeme, prema radnom mjestu i odgovarajućem platnom razredu.

(3) Osnovna plata ne može biti manja od 70% od prosječne neto plate isplaćene u Federaciji Bosne i Hercegovine (u daljem tekstu: Federaciji), prema posljednjem objavljenom statističkom podatku.

(4) U slučaju da množenjem utvrđene osnovice i pripadajućeg koeficijenta osnovna plata iznosi manje od 70% od prosječne plate, policijskom službeniku će se isplatiti plata u navedenom postotku.

(5) Ukoliko policijski službenik radi sa nepunim radnim vremenom, u skladu sa posebnim zakonom ili drugim propisom, odredit će se plata srazmjerno vremenu provedenom na radu.

(6) Puno radno vrijeme policijskog službenika je 40 sati sedmično.

Član 8.

(Određivanje plate prema činu)

(1) Plata policijskog službenika veže se uz njegov čin.

(2) Sastavni dio plate policijskog službenika čini osnovna plata iz člana 7. stav (1) ovog zakona, dodatak na platu iz člana 11. ovog zakona i naknada za prekovremeni rad, rad u dane sedmičnog odmora, noćni rad i rad u dane državnih praznika.

(3) Plata iz stava (2) ovog člana se povećava za 0,5 % za svaku punu godinu radnog staža, s tim da ukupno povećanje ne može biti veće od 20%.

Član 9.

(Vrijeme utvrđivanja osnovice za obračun plate)

(1) Osnovica iz člana 5. ovog zakona za obračun plate se utvrđuje prije donošenja Budžeta za narednu fiskalnu godinu, a primjenjuje se od 01.01. za svaku narednu godinu koja se usklađuje sa Zakonom o Budžetu odnosno sa raspoloživim sredstvima za potrebe iz člana 3. ovog zakona.

(2) Ukoliko se Vlada i Sindikat ne dogovore o osnovici iz člana 5. ovog zakona, ranije dogovorena osnovica ostaje na snazi do dogovora Vlade i Sindikata, a najduže 90 dana.

Član 10.

(Platni razredi i koeficijenti za policijskog službenika)

Koeficijent za obračun plate policijskog službenika utvrđuje se prema platnom razredu koji je vezan za čin i to:

Platni razred	Činovi	koeficijent prijedlog
I	Generalni inspektor policije	6,95
II	Glavni inspektor policije	5,90
III	Samostalni inspektor	4,90
IV	Viši inspektor	4,30
V	Inspektor	4,00
VI	Mlađi inspektor	3,60
VII	Stariji narednik	3,30
VIII	Narednik	3,10
IX	Stariji policajac	2,90
X	Policajac	2,70

Član 11.

(Pravo na poseban dodatak na platu)

(1) Zbog prirode poslova koje obavljaju, ovlaštenja, njihove složenosti, rizika i odgovornosti, policijski službenik ima pravo na poseban dodatak na platu u iznosu 30% od osnovne plate, bez dijela plate po osnovu radnog staža iz člana 8. stav (3) ovog zakona. Pravo na poseban dodatak na platu imaju policijski službenici i u slučajevima plaćenog odsustva i korištenja bolovanja za vrijeme cijelog trajanja, dok su raspoređeni na poslovima ovlaštenog službenog lica – policijskog službenika.

(2) Izuzetno, policijski službenik raspoređen rješenjem na poslove i zadatke u Jedinici za specijalističku podršku radi obavljanja poslova iz stava (1) ovog člana ima pravo na poseban dodatak na platu u iznosu do 50% od osnovne plate, bez dijela plate po osnovu radnog staža iz člana 8. stav (3) ovog zakona.

(3) Dodatak iz st. (1) i (2) ovog člana utvrđuje ministar unutrašnjih poslova Kantona Sarajevo (u daljem tekstu: Ministar) na prijedlog policijskog komesara.

(4) Uz dodatak iz stava (1) ovog člana, u posebnim okolnostima, ministar na prijedlog policijskog komesara može utvrditi veći poseban dodatak na platu za pojedina radna mjesta u iznosu do 10% od osnovne plate policijskog službenika, bez dijela plate po osnovu radnog staža iz člana 8. stav (3) ovog zakona.

Član 12.

(Jednokratni dodatak na platu)

(1) Na osnovu izvanrednih i objektivno ocijenjenih radnih rezultata policijskog službenika, ministar, na prijedlog policijskog komesara, istom može dodijeliti jednokratni dodatak na platu u iznosu do 30% od osnovne plate, bez dijela plate po osnovu radnog staža iz člana 8. stav (3) ovog zakona.

(2) Dodatak za izvanredne radne rezultate može se isplatiti istom policijskom službeniku najviše dva puta godišnje.

(3) Odluka iz stava (1) ovog člana bit će objavljena na oglasnoj ploči Ministarstva.

POGLAVLJE III -OBRAČUN I ISPLATA PLATE

Član 13.

(Obračun i isplata plate)

(1) Plata policijskog službenika se obračunava za jedan mjesec unatrag, a isplaćuje za prethodni mjesec u skladu sa Zakonom o radu („Službene novine Federacije Bosne i Hercegovine“, br.43/99, 32/00 i 29/03) i Zakonom o izvršenju Budžeta Kantona Sarajevo.

(2) Plata iz stava (1) ovog člana utvrđuje se rješenjem koje donosi ministar.

(3) Rješenje iz stava (2) ovog člana sadrži lične podatke policijskog službenika, čin, radno mjesto na koje je postavljen, platni razred i sve elemente koji su uzeti u obzir za utvrđivanje plate.

(4) Podaci o platama policijskih službenika su javni.

POGLAVLJE IV -NAKNADE

Član 14.

(Pravo na naknade)

Policijski službenik ima pravo na naknade utvrđene u odredbama čl. 15. do 29. ovog zakona.

Član 15.

(Naknada za bolovanje)

(1) Policijski službenik ima pravo na naknadu plate za vrijeme privremene spriječenosti za rad (bolovanje) do 42 kalendarska dana u visini neto plate iz prethodnog mjeseca.

(2) Naknada plate za bolovanje preko 42 dana iz stava (1) ovog člana ostvaruje se prema propisu Kantona kojim se utvrđuje naknada za ovo bolovanje, s tim da razliku do pune plate isplaćuje Ministarstvo.

Član 16.

(Naknada za slučaj nastanka teške invalidnosti ili teške bolesti)

U slučaju nastanka teške invalidnosti ili teške bolesti policijskog službenika ili člana njegove uže porodice, isplaćuje se jednokratna novčana pomoć u visini od dvije prosječne neto plate isplaćene u Federaciji prema posljednjem objavljenom statističkom podatku.

Član 17.

(Naknade)

(1) U slučaju prekovremenog rada, noćnog rada, rada u dane sedmičnog odmora i rada u dane državnih praznika, policijski službenik ima pravo na naknadu srazmjerno vremenu trajanja tog rada, uvećanu:

a) za prekovremeni rad :

1) 40% ukoliko je prekovremeni rad bio u periodu između 22,00 i 06,00 sati;

2) 30% ukoliko je prekovremeni rad bio u periodu između 06,00 i 22,00 sati;

b) za noćni rad 30%;

c) za rad u dane sedmičnog odmora 20%;

d) za rad u dane državnih praznika 50%;

(2) Obračun naknade iz stava (1) ovog člana vrši se od osnovne plate bez dijela plate po osnovu radnog staža.

(3) Policijski službenik čiji je rad rasporedom rada organizovan u turnusima – smjenama, nema

pravo na naknadu za rad u dane vikenda (subota i nedjelja) izuzev naknade za rad u dane državnih praznika i za noćni rad.

Član 18.

(Prekovremeni rad)

- (1) Prekovremeni rad je rad koji policijski službenik izvrši nakon isteka redovnog rada.
- (2) Prekovremeni rad uvodi policijski komesar pismenom naredbom o uvođenju prekovremenog rada.
- (3) Izvršnu ispravu za obračun prekovremenog rada predstavlja rješenje o prekovremenom radu.
- (4) Rješenje iz stava (3) ovog člana donosi ministar na osnovu pismene naredbe o uvođenju prekovremenog rada i izvještaja o prekovremenom radu.
- (5) Izvještaj o prekovremenom radu sačinjava i potpisuje policijski službenik kojem je naložen prekovremeni rad, a isti ovjerava njihov neposredni rukovodilac, uz obavezno navođenje podataka o policijskim službenicima koji su radili prekovremeno, broju ostvarenih sati kao i poslovima i zadacima vršenim tokom prekovremenog rada.
- (6) Naknada za prekovremeni rad isključuje pravo na naknadu za noćni rad.

Član 19.

(Naknada za privremeni interni premještaj)

(1) Policijski službenik koji je prema odredbama Zakona o policijskim službenicima Kantona Sarajevo premješten na drugo radno mjesto koje je 60 ili više kilometara udaljeno od njegovog trenutnog radnog mjesta ima pravo na naknadu za privremeni interni premještaj, koja se sastoji od:

- a) naknade troškova za odvojeni život i
- b) naknade za odgovarajući smještaj.

(2) Pravo na naknadu iz stava (1) ovog člana ne ostvaruje policijski službenik koji je premješten po ličnom zahtjevu, kao i policijski službenik koji je prvi put raspoređen na radno mjesto.

Član 20.

(Naknada za slučaj prekobrojnosti)

U slučaju prekobrojnosti, otpušteni policijski službenik ima pravo na naknadu:

- a) ukoliko ima do 15 godina penzijskog staža ima pravo na otpremninu koja odgovara iznosu plate koju je primao kada je proglašen viškom obračunate za period od pet mjeseci.
- b) ukoliko ima preko 15 godina penzijskog staža ima pravo na otpremninu koja odgovara iznosu njegovih 10 mjesečnih plata.

Član 21.

(Naknada za slučaj smrti)

(1) Policijski službenik koji u toku vršenja službene dužnosti izgubi život, sahranjuje se u mjestu koje odredi njegova porodica na trošak Ministarstva, i to:

a) troškova za prijevoz posmrtnih ostataka na mjesto ukopa;

b) putnih troškova za dvije prateće osobe;

c) troškova sahrane.

(2) U slučaju smrti policijskog službenika van vršenja službene dužnosti porodici policijskog službenika isplaćuje se naknada u visini od četiri prosječne neto plate isplaćene u Federaciji prema posljednjem objavljenom statističkom podatku.

(3) Ukoliko u Ministarstvu rade dva ili više članova porodice, naknada iz stava (2) ovog člana isplaćuju se samo jednom zaposlenom članu porodice.

(4) Porodica koju je policijski službenik iz stava (1) ovog člana izdržavao ima pravo na jednokratnu finansijsku pomoć u iznosu posljednje neto plate koju je policijski službenik ostvario uvećane šest puta.

(5) Naknada iz stava (2) ovog člana isplaćuje se policijskom službeniku u slučaju smrti člana uže porodice.

Član 22.

(Član uže porodice)

Članom uže porodice policijskog službenika, a u smislu ovog zakona, smatraju se bračni i vanbračni drug ako žive u zajedničkom domaćinstvu, dijete (bračno, vanbračno, usvojeno, pastorče i dijete bez roditelja uzeto na izdržavanje do 18 godine, odnosno do 26 godine života ako se nalazi na redovnom školovanju i nije u radnom odnosu, a djeca nesposobna za rad bez obzira na dob), roditelji (otac, majka, očuh, maćeha i usvojitelj), pod uvjetom da žive u zajedničkom domaćinstvu sa policijskim službenikom, braća i sestre bez roditelja do 18., odnosno do 26. godine ako se nalaze na redovnom školovanju i nemaju drugih prihoda, već ih korisnik naknade stvarno izdržava ili je obaveza njihovog izdržavanja zakonom utvrđena, a ako su nesposobni za rad, bez obzira na dob, pod uvjetom da sa njima živi u zajedničkom domaćinstvu i unučad ako nemaju roditelja i žive u zajedničkom domaćinstvu sa policijskim službenikom.

Član 23.

(Pravo na osiguranje od posljedica nesretnog slučaja)

(1) Policijski službenik ima pravo na osiguranje od posljedica nesretnog slučaja s uključenim rizikom od prirodne smrti za vrijeme trajanja radnog odnosa.

(2) Visina osiguranja po ovoj osnovi određuje se prema polisi osiguranja od posljedica nesretnog slučaja, odnosno polise osiguranja od prirodne smrti.

(3) Ugovor o osiguranju sa osiguravajućom kućom zaključuje ministar.

Član 24.

(Naknada za prijevoz na posao i sa posla)

(1) Policijskom službeniku kojem nije organiziran prijevoz na posao i sa posla, a čije je mjesto stanovanja od mjesta rada udaljeno najmanje dva kilometra, pripada naknada za troškove prijevoza u visini mjesečne karte, gradskog, prigradskog i međugradskog saobraćaja.

(2) U međugradski saobraćaj spadaju mjesta koja su udaljena od mjesta rada do 70 kilometara.

(3) Policijskom službeniku koji radi u smjenama pripada pravo na naknadu troškova prijevoza u visini cijene dnevne povratne karte shodno broju dolazaka na posao i odlazaka sa posla.

Član 25.

(Naknada za ishranu tokom rada)

(1) Policijski službenik ima pravo na naknadu za ishranu tokom rada (topli obrok) samo za dane prisustva na poslu, u iznosu od 1% prosječne plate u Federaciji prema posljednjem objavljenom statističkom podatku.

(2) Izuzetno od stava (1) ovog člana, policijski službenik raspoređen u Jedinicu za specijalističku podršku ima pravo na naknadu za ishranu tokom rada (topli obrok) samo za dane prisustva na poslu, u iznosu od 2% prosječne plate u Federaciji prema posljednjem objavljenom statističkom podatku.

Član 26.

(Regres za godišnji odmor)

(1) Policijski službenik ostvaruje pravo na naknadu na ime regresa za korištenje godišnjeg odmora u visini od 50% prosječne neto plate u Federaciji prema posljednjem objavljenom statističkom podatku.

(2) Pravo na regres iz stava (1) ovog člana ostvaruje policijski službenik koji u toku tekuće kalendarske godine ima pravo na godišnji odmor.

Član 27.

(Otpremnina)

Policijski službenik ima pravo na otpremninu prilikom odlaska u penziju u visini svojih pet ostvarenih prosječnih neto plata isplaćenih u prethodnih pet mjeseci.

Član 28.

(Naknada za službeno putovanje)

(1) Policijski službenik ima pravo na naknadu za troškove službenog putovanja.

(2) Za određivanje visine i uvjeta za ostvarivanje naknade za troškove službenog putovanja, primjenjuje se propis kojim je uređeno navedeno pitanje za državne službenike i namještenike u organima uprave.

Član 29.

(Naknada za vrijeme porodiljskog odsustva)

Polijski službenik za vrijeme porodiljskog dopusta ima pravo na naknadu plate prema propisima Kantona kojim se uređuje ova oblast, prema mjestu uplate doprinosa s tim da razliku do visine pune plate uplaćuje Ministarstvo.

POGLAVLJE V– DONOŠENJE RJEŠENJA I PRAVILNIKA O PLATAMA

Član 30.

(Donošenje rješenja za naknade)

(1) Naknade i druga materijalna prava predviđena u odredbama čl. 16., 17., 18., 19., 20., 21., 24., 26., 27. i 29. ovog zakona ostvaruju se donošenjem rješenja.

(2) Rješenje iz stava (1) ovog člana donosi ministar na prijedlog policijskog komesara.

Član 31.

(Donošenje Pravilnika o platama)

Ministar će na prijedlog policijskog komesara donijeti Pravilnik o platama i naknadama policijskih službenika u roku od 30 dana od dana stupanja na snagu ovog zakona, uz saglasnost Ministarstva finansija Kantona Sarajevo (u daljem tekstu: Ministarstvo finansija).

POGLAVLJE VI – NADZOR NAD PRIMJENOM OVOG ZAKONA

Član 32.

(Nadzor nad primjenom ovog zakona)

Nadzor nad primjenom ovog zakona vrši Ministarstvo i Ministarstvo finansija, u okviru svojih nadležnosti.

POGLAVLJE VII – KAZNE NE ODREDBE

Član 33.

(Kaznene odredbe)

Novčanom kaznom u iznosu od 500,00 KM do 2.000,00 KM bit će kažnjen policijski komesar, odnosno, ministar, svako u okviru ovim zakonom propisanih ovlaštenja kako slijedi:

- a) ne odredi platu policijskom službeniku u skladu sa njegovim činom (član. 8. stav 1.);
- b) ne predloži, odnosno, ne odredi dodatak na platu u skladu sa članom 11. ovog zakona;
- c) ne donese rješenje o plati (član 13. stav 2.);

- d) predloži, odnosno, odredi naknade suprotno čl. 15. do 29. ovog zakona;
- e) ne predloži ili ne donese Pravilnik o platama i naknadama (član 31.);

POGLAVLJE VIII – PRELAZNE I ZAVRŠNE ODREDBE

Član 34.

(Početak primjene odredaba čl. 25. i 26. Zakona)

Odredbe čl. 25. i 26. ovog Zakona primjenjivat će se narednog mjeseca od dana potpisivanja izmjena i dopuna Kolektivnog ugovora za službenike organa uprave i sudske vlasti u Federaciji Bosne i Hercegovine kojim su regulisane ove naknade.

Član 35.

(Prestanak primjene drugih propisa)

Danom stupanja na snagu ovog zakona prestaju da važe:

- a) odredbe Zakona o policijskim službenicima Kantona Sarajevo („Službene novine Kantona Sarajevo“, broj: 25/06 i 4/08) koje se odnose na plate, dodatke i ostale naknade ako su drugačije uređene ovim zakonom.
- b) odredbe Uredbe o platama i naknadama plata policijskih službenika Ministarstva unutrašnjih poslova Kantona Sarajevo („Službene novine Kantona Sarajevo“, broj: 10/09) i drugi akti doneseni od strane Vlade i ministra, a odnose se na predmetnu oblast.

Član 36.

(Ravnopravnost polova)

Gramatička terminologija u ovom zakonu podrazumijeva uključivanje oba spola.

Član 37.

(Stupanje na snagu)

Ovaj zakon stupa na snagu narednog dana od dana objavljivanja u „Službenim novinama Kantona Sarajevo“.

O B R A Z L O Ź E N J E

ZAKONA O PLAĆAMA I NAKNADAMA POLICIJSKIH SLUŽBENIKA POLICIJSKIH SLUŽBENIKA KANTONA SARAJEVO

I – USTAVNI TEMELJ

Ustavni temelj za donošenje ovog zakona sadržan je u odredbama člana 12. stav (1), tačka a) i 18. tačka b) Ustava Kantona Sarajevo („Službene novine Kantona Sarajevo“, broj: 1/96, 2/96, 3/96, 16/97, 14/00, 4/01, 28/04 i 05/13) i člana 35. Zakona o plaćama i naknadama policijskih službenika Federacije BiH („Službene novine Federacije BiH“, broj: 45/10).

II – RAZLOZI ZA DONOŠENJE ZAKONA

Razlozi za donošenje ovog zakona temelje se, prije svega, na potrebi definiranja oblasti raspodjele plaća i naknada uposlenih policijskih službenika u Ministarstvu unutrašnjih poslova Kantona Sarajevo na jedinstven i jednak način.

Zakonom o plaćama i naknadama policijskih službenika Federacije BiH utvrđena je obaveza kantonalnih ministarstava unutrašnjih poslova da donesu propise kojim će se utvrditi visina i način ostvarivanja plaća, naknada, dodataka na plaću, koeficijenti i platni razredi policijskih službenika uz poštivanje osnovnih načela iz člana 4. pomenutog federalnog Zakona. Također, ističemo da je Izvještajima o reviziji finansijskih izvještaja budžeta Kantona Sarajevo za posljednje dvije godine Ured za reviziju institucija u F BiH kao primjedbu naveo činjenicu da nije usvojen kantonalni zakon o plaćama za policijske službenike iako se radi o izričito propisanoj obavezi kantona koja proističe iz Zakona o plaćama i naknadama policijskih službenika Federacije BiH.

Uvažavajući ranija mišljenja i sugestije Sindikata policije Kantona Sarajevo koje su bile eksplicitne u dijelu koji se odnosi na utvrđivanje visine koeficijenata u smislu da isti moraju biti ekvivalentne sa koeficijentima na Federalnom nivou te dali detaljnu analizu i argumente kojim su se rukovodili prilikom davanja navedenog mišljenja i sugestija, nivelirani su koeficijenti i upotpunosti ispoštovano načelo: „ista plaća za isti čin policijskog službenika“. Naime, prezentirani pokazatelji nesporno ukazuju na specifičnu poziciju Sarajeva kao glavnog grada države BiH, te objektivni nivo kvantitativne opterećenosti policijskih službenika, te složenost i obima poslova i zadataka koje obavljaju u odnosu na Federalnu upravu policije kao i ostala kantonalna ministarstva unutrašnjih poslova.

Napominjemo da je na predloženi nacrt Sindikat policije MUP-a Kantona Sarajevo dao saglasnost.

Također vodilo se računa i o stavu Ustavnog suda Federacije BiH izraženog u Presudi broj: U-27/09 koja se odnosi na neustavnost Zakona o državnoj službi Federacije BiH, a koje se ostvaruju dogovorno na trajnoj osnovi uvažavajući kantonalne nadležnosti, različite situacije u pojedinim kantonima i potrebu za fleksibilnošću u provođenju (član II.3.(2) Ustava Federacije BiH), odnosno Federaciji BiH daju pravo da utvrđuje politiku i donosi zakone u toj oblasti (Član III.3.(3) Ustava Federacije BiH), ali daje i pravo kantonima da utvrđuje politiku u toj oblasti (član III.3.(4) Ustava

Federacije BiH), opredjeljenje je da se ne čekaju eventualne izmjene federalnog zakona, već da se donese ovaj kantonalni zakon kojim se, u skladu s dogovorima, utvrđuju isti koeficijenti za ista radna mjesta kao u federalnim organima, primjenjuje osnovica za obračun plaća koju utvrdi Vlada Federacije, sa mogućnošću umanjenja osnovice utvrđene na federalnom nivou do 10% uz prethodno postignuti dogovor sa Sindikatom.

III - OBRAZLOŽENJE PREDLOŽENIH RJEŠENJA

U poglavlju **I** propisano je da se predloženim zakonom uređuju plaće i naknade policijskih službenika.

Također su definirani pojmovi korišteni u zakonu, načela za utvrđivanje visine plaća, način utvrđivanja i osiguranja plaća kao i način utvrđivanja osnovice za plaću i elemenata za utvrđivanje plaće.

U **poglavljju II** su propisani platni razredi i koeficijenti za plaće policijskih službenika i propisano je deset platnih razreda sa pripadajućim koeficijentima shodno činu koji isti posjeduju. U članu 5. propisana je primjena – osnovica za obračun plaće za policijske službenike na federalnom nivou, a koju utvrđuje Vlada Federacije sa mogućnošću umanjenja visine osnovice do 10%, koju utvrđuje Vlada Kantona Sarajevo u dogovoru sa sindikatom. Napominjemo da se prilikom izrade ovog poglavlja vodilo računa o odredbama Zakona o policijskim službenicima Kantona Sarajevo kao i o dostavljenom mišljenju i sugestijama Sindikata policije Kantona Sarajevo.

U **poglavljju III** propisano je na koji način se utvrđuje plaća te šta sadrži rješenje o utvrđivanju plaće za svakog policijskog službenika. Također predviđeno je da su podaci o plaćama policijskih službenika javni čime je ispoštovano načelo transparentnosti.

U **poglavljju IV** propisane su naknade na koje policijski službenik ima pravo a odnose se na prava iz radno-pravnog odnosa policijskih službenika u visini kako je utvrđeno Zakonom o plaćama i naknadama policijskih službenika Federacije Bosne i Hercegovine. U članu 29. uvrštena je naknada za porodijsko odsustvo obzirom da se navedena kategorija iz reda policijskih službenika ne smije diskriminirati u odnosu na druge kategorije uposlenika (namještenika i državnih službenika) a koji ostvaruju navedena prava po ovom osnovu

U **poglavljju V** su propisani rokovi koji se odnose na donošenje rješenja i Pravilnika o plaćama i naknadama policijskih službenika. Predmetni rok je utvrđen objektivno i istim je ostavljen realan vremenski period za izradu i donošenje navedenog podzakonskog akta.

U **poglavljju VI** propisana su nadležna ministarstva za nadzor nad primjenom ovog zakona.

U **poglavljju VII** propisane su kaznene odredbe sa predviđenim novčanim kaznama za konkretne prekršaje.

U **poglavljju VIII** propisan je rok za stupanje na snagu ovog zakona, te su navedeni propisi koji se stavljaju van snage donošenjem ovog zakona i stupanjem na snagu istog.

IV – FINANSIJSKI IZVJEŠTAJ

Ovim nacrtom je predviđeno da će Vlada Kantona Sarajevo radi nesmetanog funkcioniranja organa vlasti Kantona za korisnike budžeta utvrditi jedinstveni isplatni koeficijent za obračun plaća u određenom postupku za fiskalnu godinu ukoliko to zahtjeva održavanje makroekonomske stabilnosti u skladu sa Zakonom o budžetu Kantona Sarajevo.

Egzaktne parametre navedenog uvećanja finansijskih sredstava nije moguće prikazati u ovoj fazi donošenja propisa, imajući u vidu činjenicu da se utvrđivanje osnovice vrši na način kako je predviđeno odredbama ovog nacrta (član 5. nacrta zakona).